

HUMPHREYS, ROBERT (1779 - 1832), gweinidog Wesleiaidd

Enw: Robert Humphreys
Dyddiad geni: 1779
Dyddiad marw: 1832
Rhyw: Gwryw
Galwedigaeth: gweinidog Wesleiaidd
Maes gweithgaredd: Crefydd
Awdur: Edward Tegla Davies

Ganwyd yn Llanelidan. Argyhoeddwyd ef dan weinidogaeth [Edward Jones](#), Bathafarn (1801). Dechreuodd bregethu yn 1804, yn Llangynog, lle'r aethai i weithio er mwyn bod o gymorth i'r achosion yno a Llanrhaeadr Mochnant a Llanfyllin. Derbyniwyd ef i'r weinidogaeth yn 1805. Priododd nith Sgwier Vaughan, Penmaen Dyfi, â'i hachubasai rhag camdriniaeth pan oedd ar daith bregethu.

Llafuriodd yn Nolgellau (1806), Manceinion (1807), Dinbych (1808). Cadwai ysgol pan oedd yng Nghaernarfon (1811-2), Dolgellau (1812). Unwyd cylchdeithiau Dolgellau a Machynlleth (1816), ac yntau'n arolygwr, Caernarfon (1816), Dinbych a Llanrwst (1819), Llandeilo (1820). Unwyd cylchdeithiau Aberhonddu a Llandeilo (1821), ac yntau'n arolygwr; Caerfyrddin (1822), Merthyr Tydfil (1825), Caerdydd (1827), Llanidloes (1830), Biwmares (1832). Cerddodd yno. Anogwyd ef ym Mangor i beidio â mynd i Fiwmares am fod y colera yno. Yno yr aeth, gan yrru ei deulu i'r wlad. Pregethodd y Sul a nos Lun, a chynnal cyfarfod gweddi am bump fore Mawrth, a bu farw nos Fawrth (31 Awst 1832) o'r colera.

Wele enghraifft gyffredin o'i lafur (dyddlyfr, Hydref 1823): ' Pregethu 468 gwaith, teithio 3,224 milltir mewn blwyddyn.' Dychwelwyd cannoedd dan ei weinidogaeth.

Cyhoeddodd gofiannau, ysgrifau diwinyddol, pregethau, emynau, ac englynion yn *Yr Eurgrawn*; *Casgliad o Emynau i'r Ysgol Sabbothol*; a llyfr o farddoniaeth - *Y Wenyen*.

Awdur

Y Parchedig Edward Tegla Davies, (1880 - 1967)

Ffynonellau

Yr Eurgrawn Wesleyaidd, 1907

E. Rees, *Robert Humphreys an early Methodist preacher in Wales* (Llundain 1913), translated from the Welsh by Howel Thomas, 1913

Teithiau a Barddoniaeth Robyn Ddu Eryri, 12

Dolenni Ychwanegol

VIAF: [29065243](#)

Wikidata: [Q20734337](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.